

## KHWAJA E HIND WO DARBAAR

Khwaja e Hind wo darbaar hai a'ala Tera  
Kabhi mehroom nahiñ maangne wala Tera

Hai teri zaat ajab behre haqeeqat pyaare  
Kisi tairaak ne paaya na kinara Tera

Gulshane hind hai shaadaab kaleje thande  
Waah aye abre karam zor barasna Tera

Phir mujhe apna dar-e paak dikha de pyaare  
Añkheñ purnoor hoñ phir dekh ke jalwa Tera

Zille Haq Gaus pe hai Gaus ka saaya tujh par  
Saaya gustar sare khuddaam pe saaya Tera

Tujh ko Baghdaad se haasil huwi wo shaan e rafee  
Dang reh jaate haiñ sab dekh ke rutba tera

Kyuñ na Baghdaad meñ jaari ho tera chashma e faiz  
Behr e Baghdaad hi ki nehr hai dariya Tera

Kursi daali teri takhte shahe jeelañ ke Huzoor  
Kitna ooñcha kiya Allah ne paaya Tera

Jab se tune qadam e Gaus liya hai sar par  
Awliya sar pe qadam lete haiñ shaaha tera

Muhiyye Deñ Gaus haiñ aur Khwaja Moinuddeen hai  
Aye **HASAN** kyuñ na ho mehfooz aqeeda Tera

## AASMAAÑ GAR TERE TALWOÑ

Aasmaañ gar tere talwoñ ka nazaara karta  
Roz ek chaand tasadduq meñ utaara karta

Tawf e rouza hi pe chakraaye the kuchh na waaqif  
Maiñ to aape meñ na tha aur jo sajda karta

Chhup gaya chaand na aayi tere deedar ki taab  
Aur agar saamne rehta bhi to sajda karta

Aaṅkh uth-ti to maiṅ jhunjhla ke palak see leta  
Dil bigadta to maiṅ ghabraa ke sambhaala karta

Suthri suthri wo fiza dekh ke maiṅ garq e gunah  
Apni aaṅkhoṅ maiṅ khud is bazm maiṅ khatka karta

Ye maz-e khoobi e qismat se jo paaye hote  
Sakht deewana tha gar khuld ki parwa karta

Maut us din ko jo phir naam watan ka leta  
Khaak us sar pe jo us dar se kinara karta

Aye **HASAN** qasd e Madina nahi rona hai yahi  
Aur maiṅ aap se kis baat ka shikwa karta

### **AASIYOṆ KO DAR TUMHARA MIL GAYA**

Aasiyoṅ ko dar tumhara mil gaya  
Be thikanoṅ ko thikana mil gaya

Fazl e Rab se phir kami kis baat ki  
Mil gaya sab kuchh jo taiba mil gaya

Nakhudaai ke liye aaye Huzoor  
Doobto niklo sahara mil gaya

Aaṅkheṅ purnam hogayiṅ sar jhuk gaya  
Jab tera naqsh e kaf e paa mil gaya

Khuld kaisa kya chaman kiska watan  
Mujh ko sehra e Madina mil gaya

Hai Mohabbat kis qadar naam e Khuda  
Naam e Haq se Naam e waala mil gaya

Un ke taalib ne jo chaha paa liya  
Un ke saail ne jo maanga mil gaya

Tere dar ke tukde haiṅ aur maiṅ gareeb  
Mujh ko rozi ka thikana mil gaya

Aye **HASAN** firdaus maiṅ jayeṅ janaab  
Hum ko sehra e Madina mil gaya

### **AISA TUIHE KHALIḠ NE TARAHDAAR BANAYA**

Aisa tuihe khaaliḡ ne tarahdaar banaya  
Yusuf ko tera taalib e deedar banaya

Tal'at se zamana ko pur anwaar banaya  
Nikhat se gali kuchoṅ ko gulzaar banaya

Kaunain banaaye gaye Sarkaar ki khaatir  
Kaunain ki khaatir tumheṅ Sarkaar banaya

Kunji tumheṅ di apne khazaanoṅ ki khuda ne  
Mehboob kiya maalik o mukhtaar banaya

Allah ki rehmat hai ke aise ki ye qismat  
Aasi ka tumheṅ haami o gamkhwaar banaya

Aalam ke salaateen bhikaari haiṅ bhikaari  
Sarkaar banaya tumheṅ Sarkaar banaya

Lillaah karam mere bhi veerana e dil par  
Sehra ko tere husn ne gulzaar banaya

Allah Ta'ala bhi huwa us ka tarafdaar  
Sarkaar tumheṅ jis ka tarafdaar banaya

Gulzaar e jinaaṅ tere liye haq ne banaye  
Apne liye tera gul e rukhsaar banaya

Be yaaro madadgaar jinheĩn koi na poochhe  
Aisoñ ka tujhe yaaro madadgaar banaya

Har baat bad a'amaaliyoñ se maine bigaadi  
Aur tum ne meri bigdi ko har baar banaya

Un ke labe rangeeñ ki nichhaawar thi wo jis ne  
Patthar meĩn **HASAN** la'al e pur anwaar banaya

### **TUMHARA NAAM MUSEEBAT MEIÑ**

Tumhara naam museebat meĩn jab liya hoga  
Hamaara bigda huwa kaam ban gaya hoga

Gunahgaar pe jab lutf aap ka hoga  
Kiya bagair kiya be kiya, kiya hoga

Khuda ka lutf huwa hoga dastageer zuroor  
Jo girte girte tera naam le liya hoga

Dikhaiy jayegi mehshar meĩn shaan e mehboobi  
Ke aap hi ki khushi aap ka kaha hoga

Khuda e paak ki chaaheinge agle pichhle khushi  
Khuda e paak khushi in ki chaahta hoga

Kisi ke paañv ki bedi ye kaat-te honge  
Koi aseer e gam in ko pukarta hoga

Kisi taraf se sadaa aayegi Huzoor aao  
Nahiñ to dum meĩn gariboñ ka faisla hoga

Kisi ke palle pe ye honge waqt e wazne amal  
Koi ummeed se muñh in ka tak raha hoga

Koi kahega duhaai hai Ya Rasoolallah  
To koi thaam ke daaman machal gaya hoga

Kisi ko le ke chaleiñge farishte sooye jaheem  
Wo in ka raasta phir phir ke dekhta hoga

Shikasta paa hooñ mere haal ki khabar kar do  
Koi kisi se ye ro ro ke keh raha hoga

Khuda ke waaste jald in se arz e haal karo  
Kise khabar hai ke dum bhar meĩn haye kya hoga

Pakad ke haath koi haale dil sunayega  
To ro ke qadmoñ se koi lipat gaya hoga

Zabaan sookhi dikhaakar koi lab e kausar  
Koi Siraat par in ko pukaarta hoga

Ye beqaraar karegi sada gariboñ ki  
Muqaddas aañkhoñ se taar ashk ka bandha hoga

Wo paak dil ke nahiñ jis ko apna andesha  
Hujoom e fikr o taraddud meĩn ghir gaya hoga

Hazaar jaan fida narm narm paoñ se  
Pukaar sun ke aseeroñ ki daudta hoga

Azeez bachhe ko maañ jis tarah talaash kare  
Khuda gawaah yahi haal Aap ka hoga

Khudayi bhar unhiñ hathoñ ko dekhti hogi  
Zamana bhar unhiñ Qadmoñ pe loat-ta hoga

Bani hai dum pe duhai hai taaj wale ki  
Ye gul ye shor ye hangama ja bajaa hoga

Kahenge aur Nabi *"izhabu ila gairi"*  
Mere huzoor ke lab par *"ana laha"* hoga

Dua e ummat e badkaar wird e lab hogi  
Khuda ke saamne sajda mein sar jhuka hoga

Gulaam un ki inaayat se chain mein honge  
'Adu huzoor ka aafat mein mubtila hoga

Maiñ un ke dar ka bhikari hoon fazl e Maula se  
**HASAN** faqeer ka jannat mein bistara hoga

### **WAAH KYA MARTABA HUWA TERA**

Waah kya martaba huwa tera  
Tu khuda ka khuda huwa tera

Taaj wale hon us mein ya mohtaaj  
Sab ne paaya diya huwa tera

Haath khali koi phira na phire  
Hai khazaana bhara huwa tera

Jo tera ho gaya khuda ka huwa  
Jo khuda ka huwa huwa tera

Zaat bhi teri intekhaab huwi  
Naam bhi Mustafa huwa tera

Jise tuney diya khuda ne diya  
Dain Rab ki diya huwa tera

Ek aalam Khuda ka taalib hai  
Aur taalib Khuda huwa tera

Meri ta'at se mere jurm fazoon  
Lutf sab se badha huwa tera

Kaam bigde huwe banaa dena  
Kaam kis ka huwa huwa tera

Aye jinaa mein mere gul ke sadqe mein  
Takhta takhta basaa huwa tera

Is jalaalat ke shaher yaar kahaan  
Milc, mulk e Khuda huwa tera

Khalq kehti hai Laa Makaan jis ko  
Sheh nasheen hai sajaa huwa tera

Sukhe ghaaton mera utaar ho kyun  
Ke hai dariya chadha huwa tera

Le khabar hum tabaah kaaron ki  
Qaafila hai luta huwa tera

Bigdi baaton ki fikr kar na **HASAN**  
Kaam sab hai banaa huwa tera

### **BAYAAÑ HO KIS ZABAAÑ SE**

Bayaañ ho kis zubaañ se martaba Siddeeq e Akbar ka  
Hai yaar e gaar Mehboob e Khuda Siddeeq e Akbar ka

Ilahi reham farma khaadim e Siddique Akbar hoon  
Teri rehmat ke sadqe waasta Siddeeq e Akbar ka

Rusul aur Ambiya ke baad jo afzal ho aalam se  
Ye aalam mein hai kis ka martaba Siddeeq e Akbar ka

Gadaa Siddeeq e Akbar ka Khuda se fazl paata hai  
Khuda ke fazl se maiñ hoon gadaa Siddeeq e Akbar ka

Nabi ka aur khuda ka madh go Siddeeq e Akbar hai  
Nabi Siddeeq e Akbar ka Khuda Siddeeq e Akbar ka

Huwe Farooq o Usman o Ali jab daakhil e bai'at  
Banaa fakhr e salaasil silsila Siddeeq e Akbar ka

Maqaam e Khwaab e raahat chain se aaram karne ko  
Banaa pehlu e Mehboob e Khuda Siddeeq e Akbar ka

Ali haiñ us ke dushman aur wo dushman Ali ka hai  
Jo dushman aql ka dushman huwa Siddeeq e Akbar ka

Lutaaya raahe haq mein ghar kayi baar is mohabbat se  
Ke lut lut kar **HASAN** ghar ban gaya Siddeeq e Akbar ka

### NAHIN KHUSHBAKHT MOHTAJAAN E AALAM

Nahiñ khushbakht mohtajaan e aalam mein koi humsa  
Mila taqdeer se haajat rawaa Farooq e Azam sa

Tera rishta bana sheeraaza e Jamiyat e khatir  
Pada tha daftar e deen e kitabullah barham sa

Murad aayi muradein milne ki pyari ghadi aayi  
Mila haajat rawaa hum ko dar e sultane aalam sa

Tere jood o karam ka koi andaza kare kyunkar  
Tera ek ek gadaa Faiz o sakhaawat mein hai haatim sa

Fida aye umme kulsoom aap ki taqdeer e yaawar ke  
Ali baba huwa dulha banaa Farooq e Akram sa

Gazab mein dushmanon ki jaan hai teg e sar afgan se  
Khurooj o rifz ke ghar mein na kyun barpaa ho maatam sa

Manaayen eid jo zilhijja mein teri shahaadat ki  
Ilahi rozo maaho san unhein guzre muharram sa

**HASAN** dar aalam e pasti sar e rif'at agar dari  
Baya farq e iradat bar dare Farooq e Azam sa

### ALLAH SE KYA PYAR HAI

Allah se kya pyar hai Usman e Gani ka  
Mehboobe khuda yaar hai Usman e Gani ka

Rangeen wo rukhsaar hai Usman e Gani ka  
Bulbul gul e gulzaar hai Usman e Gani ka

Garmi pe ye baazaar hai Usman e Gani ka  
Allah kharidaar hai Usman e Gani ka

Sarkaar ataa paash hai Usman e Gani ka  
Darbaare durarbaar hai Usman e Gani ka

Jis aaina mein Noor e Ilahi nazar aaye  
Wo aaina e rukhsaar hai Usman e Gani ka

Sarkaar se paayenge muraadon pe muraadein  
Darbaar ye durbaar hai Usman Gani ka

Azaad girافتaar e balaaye do jahaan hai  
Azaad girافتaar hai Usman e Gani ka

Allahu Gani hadd nahiñ in'aam o ataa ki  
Wo faiz pe darbaar hai Usman e Gani ka

Ruk jaayein mere kaam **HASAN** ho nahiñ sakta  
Faizaan madadgaar hai Usman e Gani ka

### AYE HUBBE WATAN SAATH NA YUN

Aye hubbe watan saath na yun sooye najaf ja  
Hum aur taraf jaate haiñ tu aur taraf ja

Chal hind se chal hind se chal hind se gaafil  
Uth sooye najaf sooye najaf sooye najaf ja

Phansta hai wabaalon mein abas akhtar e taale'  
Sarkaar se paayega sharaf behre sharaf ja

Aańkhoń ko bhi mehroom na rakh husn e ziya se  
Ki dil mein agar aye mahe be daag o kalaf ja

Aye kulfat e gum banda e maula se na rakh kaam  
Be faida hoti hai teri umr talaf ja

Aye tal'ate sheh aa tujhe maula ki qasam aa  
Aye Zulmat e Dil ja tujhe us rukh ka halaf ja

Ho jalwa fiza saahib e qausain ka naaib  
Haań Teere dua behre khuda soo e hadaf ja

Kyuań garqe alam hai durre maqsood se muńh bhar  
Neesaan e karam ki taraf aye tishna sadaf ja

Jeelaań ke sharaf hazrat e Maula ke khalaf haiń  
Aye naa khalaf uth jaanibe taazeem e khalaf ja

Tafzeel ka joya na ho maula ki vila mein  
Yuań chhod ke gohar ko na to behr e khazaf ja

Maula ki imaamat se mohabbat hai to aye gaafil  
Arbaabe jama'at ki na tu chhod ke saf ja

Keh de koi ghera hai balaań ne **HASAN** ko  
Aye Shere Khuda behre madad tege bakaf ja

### **DARD E DIL KAR MUJHE**

Dard e dil kar mujhe ataa Ya Rab  
De mere dard ki dawaa Ya Rab

Laaj rakh le gunaahgaaroń ki  
Naam Rehmaan hai tera Ya Rab

Aib mere na khol mehshar mein  
Naam Sattaar hai Tera Ya Rab

Be sabab bakhsh de na poochh amal  
Naam Gaffaar hai Tera Ya Rab

Bhool kar bhi na aaye yaad apni  
Mere dil se mujhe bhula Ya Rab

Khaak kar apne aastaane ki  
Yuań hamein khaak mein mila Ya Rab

Meri aańkhein mere liye tarsein  
Mujh se aisa mujhe chhupa Ya Rab

Tuney mere zaleel haathoń mein  
Daaman e Mustafa diya Ya Rab

Tuney di mujh ko ne'amate Islaam  
Phir Jama'at mein le liya Ya Rab

Kar diya tuney Qaadri mujh ko  
Teri qudrat ke main fida Ya Rab

Daulatein aisi ne'amatein itni  
Be garaz tuney keeń ataa Ya Rab

De ke lete Naheen kareem kabhi  
Jo diya jis ko de diya Ya Rab

Tu kareem aur kareem bhi aisa  
Ke nahiń jis ka dosara Ya Rab

Is nikamme se kaam le aise  
Ye nikamma ho kaam ka Ya Rab

Mujhe aise amal ki de taufeeq  
Ke ho raazi teri raza Ya Rab

Mujhe donoń jahaań ke gam se bacha  
Shaad rakh shaad daaima Ya Rab

Mere ahbaab par bhi fazl rahe  
Tera tere habeeb ka Ya Rab

Ahlesunnat ki har Jama'at par  
Har jagah ho teri ataa Ya Rab

Dushmanoñ ke liye hidaayat ki  
Tujh se karta hoon ilteja Ya Rab

Tu **HASAN** ko utha **HASAN** kar ke  
Ho Ma'al khair khaatma Ya Rab

### SUBHE SHAB E WILAADAT

Purnoor hai zamana Subhe Shab e Wilaadat  
Parda utha hai kis ka Subhe Shab e Wilaadat

Jalwa hai haq ka jalwa Subhe Shab e Wilaadat  
Saaya khuda ka Saaya Subhe Shab e Wilaadat

Fasl e bahaar aayi shakle nigaar aayi  
Gulzaar hai zamaana Subhe Shab e Wilaadat

Qatra mein laakh dariya gul mein hazaar gulshan  
Nashwo numa hai kya kya Subhe Shab e Wilaadat

Jannat ke har makaañ ki aaina bandiyañ haiñ  
Aarasta hai duniya Subhe Shab e Wilaadat

Makka mein shaam ke ghar roshan hai har nigaah par  
Chamka hai wo ujaala Subhe Shab e Wilaadat

Aayi nayi hukoomat sikka nayaa chalega  
Aalam ne rang badla Subhe Shab e Wilaadat

Roohul ameen ne gaada kaabe ki chhat pe jhanda  
Ta arsh uda pharera Subhe Shab e Wilaadat

Padhte haiñ arsh wale sunte haiñ farsh wale  
Sultaan e nao ka khutba Subhe Shab e Wilaadat

Pyare Rabiul Awwal teri jhalak ke sadqe  
Chamka diya naseeba Subhe Shab e Wilaadat

Nausha banaao unko Dulha banaao unko  
Hai arsh tak ye shohra Subhe Shab e Wilaadat

Shaadi rachi huwi hai bajte haiñ shaadiyaane  
Dulha banaa wo dulha Subhe Shab e Wilaadat

Mehroom reh na jaayeñ din raat barkatoñ se  
Is waaste wo aaya Subhe Shab e Wilaadat

Arsh e azeem jhume ka'aba zameen chume  
Aata hai arsh wala Subhe Shab e Wilaadat

Hushyaar hoñ bhikaari nazdeek hai sawaari  
Ye keh rahaa hai danka Subhe Shab e Wilaadat

Uttho Huzoor aaye shaahe gayoor aaye  
Sultaan e deeno duniya Subhe Shab e Wilaadat

Sukhi zabaano aao aye jalti jaanoñ aao  
Lehra raha hai dariya Subhe Shab e Wilaadat

Murjhaai kaliyoñ aao kumhlaye phooloñ aao  
Barsaa karam ka jhaala Subhe Shab e Wilaadat

Teri chamak damak se aalam jhalak raha hai  
Mere bhi bakht chamka Subhe Shab e Wilaadat

Taareek raat gam ki laayi balaa sitam ki  
Sadqa tajalliyoñ ka Subhe Shab e Wilaadat

Laaya hai sheer tera Noor e khuda ka jalwa  
Dil kar de doodh dhoya Subhe Shab e Wilaadat

Baañta hai do jahañ mein tuneziya ziya ka baada  
De de **HASAN** ka hissa Subhe Shab e Wilaadat



## BAAG JANNAT KE HAIÑ

Baag Jannat ke haiñ behre madh khwaane Ahle Bait  
Tum ko muzda naar ka aye dushmanaane Ahle Bait

Kis zubaañ se ho bayaane izzo shaane Ahle Bait  
Madh goye mustafa haiñ madhkhwaane Ahle Bait

Un ki paaki ka khudaaye paak karta hai bayaañ  
Aaya-e-tatheer se zaahir hai shaan e Ahle Bait

Un ke ghar me bey ijaazat jibraeel aate nahiñ  
Qadr waale jaante haiñ qadr o shaane Ahle Bait

Razm ka maidaañ banaa hai jalwah gaahe Husn o Ishq  
Karbala mein ho raha hai imtehaan e Ahle Bait

Hooraiñ karti haiñ aroosane shahaadat ka singaar  
Khubaru doolha banaa hai har jawaan e Ahle Bait

Kis shaqi ki hai hukumat haaye kya andher hai  
Din dahaade lut raha hai kaarwaan e Ahle Bait

Khaak par Abbas o Usman e alambardaar haiñ  
Bekasi ab kaun uthaayega nishaan e Ahle Bait

Faatma ke laadle ka aakhri deedaar hai  
Hashr ka hangaama barpa hai myaan e Ahle Bait

Baag e jannat chhodkar aaye haiñ mehboob e khuda  
Aye zahe qismat tumhari kushtagaan e Ahle Bait

Hureiñ be parda nikal aayi haiñ sar khole huwe  
Aaj kaisa hashr hai barpa myaan e Ahle Bait

Ghar lutaana jaan dena koi tujh se seekh jaaye  
Jaan e aalam ho fida aye khaandaan e Ahle Bait

Sar shaheedaan e mohabbat ke haiñ nezoñ par buland  
Aur oonchi ki khuda ne qadr o shaan e Ahle Bait

Zakhm khaane ko to aabe teg peene ko diya  
Khoob daawat ki bulaakar dushmanaan e Ahle Bait

Apna sauda bech kar baazaar soona kar gaye  
Kaunsi basti basaai taajiraan e Ahle Bait

Ahle Bait e paak se gustaakhiyaañ bebaakiyaañ  
*La'natullahi Alaikum* dushmanaan e Ahle Bait

Be adab gustaakh firqe ko sunaade aye **HASAN**  
Yun kaha karte haiñ Sunni daastan e Ahle Bait

## SAIR E GULSHAN KAUN DEKHE

Sair e gulshan kaun dekhe dasht e taiba chhod kar  
Sooye jannat kaun jaaye dar tumhara chhod kar

Sar guzasht e gam kahoon kis se tere hote huwe  
Kis ke dar par jaaon tera aastaana chhod kar

Be liqa e yaar un ko chain aa jata agar  
Baar baar aate na yun jibreel sidrah chhod kar

Kis tamanna par jiyeñ ya Rab aseeraane qafas  
Aa chuki baad e saba baag e Madina chhod kar

Khuld kaisa nafs sarkash jaaunga taiba ko maiñ  
Bad chalan hat kar khada ho mujh se rastaa chhod kar

Hashr mein ek ek ka munh takte phirte haiñ adu  
Aafaton mein phañs gaye un ka sahara chhod kar

Mar ke jeete haiñ jo un ke dar pe jaate haiñ **HASAN**  
Jee ke marte haiñ jo jaate haiñ Madina chhod kar

## SUNLO KHUDA KE WAASTE

Sunlo khuda ke waaste apne gadaa ki arz  
Ye arz hai huzoor bade be nawaa ki arz



Unke gadaa ke dar pe hai yuñ baadshaah ki arz  
Jaise ho baadshaah ke dar par gadaa ki arz

Qurbaan un ke naam ke be un ke naam ke  
Maqbool ho na khaas e janaab e Khuda ki arz

Gum ki ghataayein chhaayi hai mujh teera bakht par  
Aye mehr sun le zarra e bedast o paa ki arz

Aye bekason ke haami o yaawar siwa tere  
Kis ko garaz hai kaun sune muftala ki arz

Dukh mein rahe koi ye gavaara nahi unhein  
Maqbool kyun na ho dil e dard aashna ki arz

Kyun tul duñ Huzoor ye dein ye ata karein  
Khud jaante hain aap mere mudda'aa ki arz

Daaman bharenge daulat e fazl e khuda se hum  
Khaali kabhi gayi hai **HASAN, MUSTAFA** ki arz

### **TUM PAR SALAAM HAR DUM**

Aye deen e haq ke rehbar Tum par Salaam har dum  
Mere shafee'e mehshar Tum par Salaam har dum

Is bekas o hazaar par jo kuchh guzar rahi hai  
Zahir hai sab wo tumpar Tum par Salaam har dum

Duniya o akhirat mein jab main rahoon salaamat  
Pyare padhoun na kyunkar Tum par Salaam har dum

Banda tumhare dar ka aafat mein muftala hai  
Rehm aye Habeeb e daawar Tum par Salaam har dum

Lillaah ab hamaari fariyaad ko pahunchiye  
Be had hai haal abtar Tum par Salaam har dum

Koi nahi hai mera main kis se daad chahoon  
Sultaane banda parwar Tum par Salaam har dum

Bulwaake apne dar par ab mujh ko dije izzat  
Phirta hun khwaar dar dar Tum par Salaam har dum

Mohtaj se tumhare karte hain sab kinaara  
Bas ek tumhein ho yaawar Tum par Salaam har dum

Koi nahi hamara hum kis ke dar pe jayein  
Aye bekason ke yaawar Tum par Salaam har dum

Apne gadaa e dar ki leje khabar khudaara  
Keje karam **HASAN** par Tum par Salaam har dum

### **TERE DAR PE SAAJID HAIN**

Tere dar pe saajid hain shaahaane aalam  
Tu Sulatane aalam hai aye jaan e aalam

Ye pyaari adaayein ye neechi nigaahein  
Fida jaan e aalam ho aye jaan e aalam

Mere dardba wale main tere sadqe  
Tere dar ke kutte hain shaahan e aalam

Tumhari taraf haath phail hain sabke  
Tumhi poore karte ho armaan e aalam

Musalmaan musalmaan hai tere sabab se  
Meri jaan tu hi hai Imaan e aalam

Mere aan wale mere shaan wale  
Gadaayi tere dar ki hai shaane aalam

Wo dulha hain saari Khudaayi baraati  
Unhi ke liye hai ye saamaan e aalam

Na dekha koi phool tujh saa na dekha  
Bahut chhaan daale gulistan e aalam

Tere koocha ki khaak thehri azal se  
Meri jaan ilaaje mareezan e aalam

Koi jaan e Eisa ko jaa kar khabar de  
Marey jaate haiñ dard mandaane aalam

Abhi saare beemaar hote haiñ achhe  
Agar lab hila de wo darmaan e aalam

Samee'an khudaara **HASAN** ki bhi sun le  
Balaa mein hai ye laus e daamaan e aalam

### **ASEEROÑ KE MUSHKIL KUSHA GAUS E AAZAM**

Aseeroñ ke mushkil kusha Gaus e Aazam  
Faqeeron ke haajat rawaa Gaus e Aazam

Ghira hai balaaon mein bandaa tumhara  
Madad ke liye aao Ya Gaus e Aazam

Tere haath mein haath maine diya hai  
Tere haath hai laaj Ya Gaus e Aazam

Mureedon ko khatra nahiñ behre gam se  
Ke bede ke haiñ naakhuda Gaus e Aazam

Tumheen dukh suno apne aafat zadoñ ka  
Tumheen dard ki do dawa Gaus e Aazam

Bhañwar mein phaṅsa hai hamaara safeena  
Bachaa Gaus e Aazam bachaa Gaus e Aazam

Jo dukh bhar rahaa hoon jo gam seh rahaa hoon  
Kahoon kis se tere siwa Gaus e Aazam

Zamaane ke dukh dard ki ranj o gam ki  
Tere haath mein hai dawa Gaus e Aazam

Agar sultanat ki hawas ho faqeeron  
Kaho "*shai al lillaah*" Ya Gaus e Aazam

Nikaala hai pehle to doobe huwoñ ko  
Aur ab doobtoñ ko bachaa Gaus e Aazam

Jise khalq kehti hai pyaara Khuda ka  
Usi ka hai tu laadla Gaus e Aazam

Phaṅsa hai tabaahi mein beda hamaara  
Sahaara lagaa do zaraa Gaus e Aazam

Mashaaikh jahaañ aaye behr e gadaai  
Wo hai teri daulat saraa Gaus e Aazam

Meri mushkilon ko bhi aasaan kijiye  
Ke haiñ aap mushkil kusha Gaus e Aazam

Wahaañ sar jhukaate haiñ sab uñche uñche  
Jahaañ hai tera naqsh e paa Gaus e Aazam

Qasam hai ke mushkil ko mushkil na paaya  
Kaha hum ne jis waqt Ya Gaus e Aazam

Mujhe apni ulfat mein aisaa guma de  
Na paoñ phir apna pataa Gaus e Aazam

Bachaale gulaamon ko majbooriyon se  
Ke tu Abd e Qadir hai Ya Gaus e Aazam

Kahe kis se jaakar **HASAN** apne dil ki  
Suney kaun tere siwaa Gaus e Aazam

### **NA KYUÑ AARAAISHEIÑ KARTAA**

Na kyuñ aaraaisheñ kartaa khuda duniya ke saamaañ mein  
Tumheñ doolha banaakar bhejna tha bazme e imkaañ mein

Ye rangeeni ye shaadaabi kahañ gulzaar e rizwaañ mein  
Hazaaron jannateñ aakar basi hai kooye jaanaañ mein

Tum aaye roshni phaili huwaa din khul gayiñ aañkheñ  
Andhera sa andhera chha rahaa tha bazm e imkaañ meñ

Ajab andaaz se mehboob e haq ne jalwa farmaaya  
Suroor añkhoñ meñ aaya jaan dil meñ noor imaañ meñ

Kalim aasaa na kyuñkar gash hoñ un ke dekhne wale  
Nazar aate haiñ jalwe toor ke rukhsaar e taabaañ meñ

Hawa badli ghire baadal khiley gul bulbuleñ chehkeñ  
Tum aaye ya bahaare jaañfizaa aayi gulistaañ meñ

Usey kismat ne us ke jeete ji jannat meñ pahuñchaaya  
Jo dum lene ko baitha saaya e deewaar e jaanaañ meñ

Chaman kyuñkar na mehkeñ bulbuleñ kyunkar na aashiq hoñ  
Tumhara jalwa e rangeñ bhara phooloñ ne daamaañ meñ

Yahañ ke sangrezon se **HASAN** kya la'al ko nisbat  
Ye un ki rehghuzar meñ haiñ wo pathar hai badakhshaañ meñ

### **DIL MEIÑ HO YAAD TERI GOSHA E TANHAANI HO**

Dil meñ ho yaad teri gosha e tanhaai ho  
Phir to khalwat meñ ajab anjuman aaraai ho

Aastaane pe tere sar ho ajal aayi ho  
Aur aye jaane jaahañ tu bhi tamaashaai ho

Uski qismat pe fida takht e shahi ki raahat  
Khaak e taiba pe jise chain ki neend aayi ho

Ek jhalak dekhne ki taab nahiñ aalam ko  
Wo agar jalwa kare kaun tamaashaai ho

Aaj jo aib kisi par nahiñ khulne dete  
Kab wo chaahenge meri hashr meñ ruswaai ho

Yahi manzoor tha Qudrat ko ke saaya na bane  
Aise yakta ke liye aisi hi yaktaai ho

Jab uthe dast e ajal se meri hasti ka hizaab  
Kaash us parda ke andar teri zebai ho

Kabhi aisa na huwa un ke karam ke sadqe  
Haath ke phailne se pehle na bheek aayi ho

Band jab khwaab e ajal se ho **HASAN** ki aañkheñ  
Us ki nazron meñ tera jalwa e zebai ho

### **TUM ZAATE KHUDA SE**

Tum zaat e khuda se na juda ho na Khuda ho  
Allah ko ma'loom hai kya jaaniye kya ho

Ye kyuñ kahoon mujh ko ye ataa ho ye ataa ho  
Wo do ke hamesha mere ghar bhar ka bhalaa ho

Mitti na ho barbaad pasey marg Ilaahi  
Jab khaak udey meri Madina ki hawaa ho

Mangta to hai mangta koi shaahon meñ dikha de  
Jis ko mere Sarkaar se tukda na mila ho

Har waqt karam banda nawazi pe tula hai  
Kuchh kaam nahi is se bura ho ke bhalaa ho

Abraar neko kaar Khuda ke haiñ Khuda ke  
Unka hai wo unka hai jo bad ho jo bura ho

Shaabaash **HASAN** aur chamakti si gazal padh  
Dil khol kar aaina e Imañ ki jila ho

### **DIL DARD SE BISMIL KI TARAH**

Dil dard se bismil ki tarah loat rahaa ho  
Seene pe tasalli ko tera haath dharaa ho

Kyuñ apni gali meñ wo rawaadaar e sadaa ho  
Jo bheek liye raahe gadaa dekh rahaa ho

Gar waqt e ajal sar teri chaukhat pe jhuka ho  
Jitni ho qaza ek hi sajde mein adaa ho

Firdaus ke baagon se idhar mil nahi sakta  
Jo koi Madina ke bayaabaañ mein guma ho

Dekha unhein mehshar mein to Rahmat ne pukaara  
Aazaad hai jo aap ke daaman se bandha ho

Aata hai faqeroon pe unhein pyaar kuch aisa  
Khud beek dein aur khud kahein mangta ka bhalaa ho

Dhoondha hi karein sadr e qayaamat ke sipaahi  
Wo kis ko miley jo tere daaman mein chhupa ho

Jab dene ko bheek aaye sarey kuwe gadaayaañ  
Lab par ye dua thi mere mangta ka bhalaa ho

De daaliye apne labey jaañ bakhsh ka sadqa  
Aye chara e dil darde **HASAN** ki bhi dawaa ho

### BAHAAR E MADINA

Ajab rang par hai bahar e Madina  
Ke sab jannatein haiñ nisaar e Madina

Mubaarak rahe andaleebo tumhein gul  
Hamein gul se behtar hai khaar e Madina

Meri khaak ya Rab na barbaad jaaye  
Pasey marg kar de gubaar e Madina

Rag e gul ki jab naazuki dekhta hoon  
Mujhe yaad aate haiñ khaar e Madina

Malaaiik lagaate haiñ aankhon mein apni  
Shab o roz khaake mazaar e Madina

Jidhar dekhiye baag e jannat khila hai  
Nazar mein haiñ naqsh o nigaar e Madina

Rahein unke jalwe basein unke jalwe  
Mera dil baney yaadgaar e Madina

Do Aalam mein bat-ta hai Sadqa yahaan ka  
hamiin ek nahiñ reza khwaar e Madina

Banaa aasmaan manzil e ibn e Mariyam  
Gaye Laa Makaañ Taajdaar e Madina

Muraad e dil e bulbule be nawa de  
Khudaaya dikhaade bahaar e Madina

Sharaf jin se haasil huwa Ambiya ko  
Wahi haiñ **HASAN** iftekhaar e Madina

### NA HO AARAAM JIS BEEMAAR KO

Na ho aaraam jis beemaar ko saare zamaane se  
Utha le jaaye thodi khaak un ke aastaane se

Tumhaare dar ke tukdon se pada palta hai ek Aalam  
Guzaara sab ka hota hai isi mohtaaj khaane se

Shab e Asra ke dulha par nichhaawar hone waali thi  
Nahiñ to kya garaz thi itni jaanon ke banaane se

Koi firdaus ho ya khuld ho hum ko garaz matlab  
Lagaaya ab to bistar aap hi ke aastaane se

Na kyun un ki taraf Allah sau sau pyar se dekhe  
Jo apni aankhein malte haiñ tumhare aastaane se

Tumhaare to wo ehsaan aur ye naafarmaaniyaañ apni  
Hamein to sharm si aati hai tumko munh dikhaane se

Zameen thodi si dede behr e madfan apne kuche mein  
Lagaa de mere pyaare meri mitti bhi thikaane se

Palat-ta hai jo zaa'ir us se kehta hai naseeb us ka  
Arey gaafil qazaa behtar hai yaañ se phir ke jaane se

Bulaalo apne dar par ab to hum khaana badoshon ko  
Phireñ kab tak zalil o khwaar dar dar be thikaane se

Na pahuñche un ke qadmon tak na kuch husn e amal hi hai  
**HASAN** kya poochhte ho hum gaye guzrey zamaane se

### **MURADEIÑ MIL RAHI HAIÑ SHAAD SHAAD UN KA SAWAALI HAI**

Muradeiñ mil rahi haiñ shaad shaad unka sawaali hai  
Labon par ilteja hai haath mein Rauze ki jaali hai

Teri soorat teri seerat zamaane se niraali hai  
Teri har har adaa pyaare daleel e bemisaali hai

Bashar ho ya malak jo hai tere dar ka sawaali hai  
Teri sarkaar waalaa hai tera darbaar aali hai

Wo haiñ Allaah waale jo tujhe waali kahein apna  
Ke tu Allaah waala hai tera Allaah waali hai

Faqeero be nawaao apni apni jholiyaañ bhar lo  
Ke baada bat raha hai faiz par Sarkaar e aali hai

Nikaala kab kisi ko bazm e faiz e aam se tum ne  
Nikaali hai to aane waalon ki hasrat nikaali hai

Faqat itna sabab hai in'eqad e bazm e mehshar ka  
Ke un ki shaane mehboobi dikhaai jaane waali hai

Khuda shaahid ke roz e hashr ka khatka nahiñ rehta  
Mujhe jab yaad aata hai ke mera kaun waali hai

Sharaf Makka ki basti ko mila Taiba ki basti se  
Nabi waali hi ke sadqe mein wo Allaah waali hai

Wahi waali wahi aaqa wahi waaris wahi Maula  
Maiñ un ke sadqe jaoon aur mera kaun waali hai

Muraadon se tumhiñ daaman bharoge na muraadon ke  
Garibon bekason ka aur pyaare kaun waali hai

Hamesha tum karam karte ho bigde haal waalon par  
Bigad kar meri haalat ne meri bigdi banaali hai

Tumhare dar tumhare aastaañ se maiñ kahañ jaoon  
Na mujh sa koi bekas hai na tum sa koi waali hai

**HASAN** ka dard dukh mauqoof farmaakar bahaali do  
Tumhare haath mein duniya ki mauqoofi bahaali hai

### **KAREY CHAARAA SAAZI ZIYAARAT KISI KI**

Karey chaaraa saazi ziyaarat kisi ki  
Bhare zakhm dil ke malaahat kisi ki

Chamak kar ye kehti hai tal'at kisi ki  
Ke deedar e haq hai ziyaarat kisi ki

Na rehti jo pardoñ mein soorat kisi ki  
Na hoti kisi ko ziyaarat kisi ki

Ajab pyaari pyaari hai soorat kisi ki  
Hameiñ kya khuda ko hai ulfat kisi ki

Kisi ko kisi se huwi hai na hogi  
Khuda ko hai jitni mohabbat kisi ki

Rahe dil kisi ki mohabbat mein har dum  
Rahe dil mein har dum mohabbat kisi ki

Khuda ka diya hai tere paas sab kuchh  
Tere hote kya hum ko haajat kisi ki

Zamaane ki daulat nahiñ pas phir bhi  
Zamaane mein bat-ti hai daulat kisi ki

Na pahuñche, kahein aql e kul ke farishte  
Khuda jaanta hai haqeeqat kisi ki

Qamar ek ishaare mein do tukde dekha  
Zamaane pe raushan hai taaqat kisi ki

Hameen hai kisi ki shafa'at ki khaatir  
Hamaari hi khaatir shafa'at kisi ki

Museebat zado shaad ho tum ke un se  
Nahi dekhi jaati museebat kisi ki

Na pahunche jab tak gunehgaar unke  
Na jaayegi jannat mein ummat kisi ki

Madina ka jungle ho aur hum hon zaahid  
Nahi chahiye hum ko jannat kisi ki

Bharey jaayenge khuld mein ahle isyaan  
Na jaayegi khaali shafa'at kisi ki

Wahi sab ke maalik Unhi ka hai sab kuchh  
Na Aasi kisi ke na Jannat kisi ki

Khuda se dua hai ke hangaam e rukhsat  
Zabaan e **HASAN** par ho midhat kisi ki

### DUM E IZTIRAAB MUJH KO

Dum e izzat mujh ko jo khayaal e yaar aaye  
Mere dil mein chain aaye to usey qaraar aaye

Teri wehshaton se aye dil mujhe kyun na 'aar aaye  
Tu uhi se dur bhaage jinhein tujh pe pyaar aaye

Mere dil ko dard e ulfat wo sukoon de Ilaahi  
Meri be qaraariyon ko na kabhi qaraar aaye

Mujhe naz'aa chain bakhshe mujhe maut zindagi de  
Wo agar mere sirhaane damey izzat aaye

Na habeeb se muhib ka kahi aisa pyaar dekha  
Wo baney khuda ka pyara tumhein jis pe pyaar aaye

Mujhe kya alam ho gam ka mujhe kya ho gam alam ka  
Ke ilaaj gam alam ka mere gamgusar aaye

Jo chaman banaaye ban ko jo jinaan karey chaman ko  
Mere baag mein Ilaahi kabhi wo bahaar aaye

Tere sadq-e jaaye shaahaa Ye tera zaleel mangta  
Tere dar pe bheek lene Sabhi shehr yaar aaye

Chamak uthe khaak e teera baney mehr zarra zarra  
Mere chaand ki sawaari jo sar e mazaar aaye

Teri rehmaton se kam hai mere jurm is se zaaid  
Na mujhe hisaab aaye na mujhe shumaar aaye

Tere sadq-e tera sadqa hai wo shaandaar sadqa  
Wo waqar leke jaaye jo zaleelo khwaar aaye

Tere dar ke hai bhikaari miley khair dum qadam ki  
Tera naam sunke daata hum ummeedwaar aaye

**HASAN** un ka naam lekar to pukaar dekh gam mein  
Ke ye woh nahi jo gaafil pasey izzat aaye

